



---

Broj: **03/1-50-14-7-12/21**

Sarajevo, **17. 2. 2021.**

**ČLANOVIMA ZAJEDNIČKE KOMISIJE ZA ODBRANU I SIGURNOST BiH:**

**Asimu Sarajliću, Borjani Krišto, Dušanki Majkić, Sanji Vulić, Dženanu Đonlagiću, Draganu Mektiću, Šemsudinu Mehmedoviću, Sredoju Noviću, Marini Pendeš, Amiru Fazliću, Zukanu Helezu i Bariši Čolaku**

**PREDMET: Radna posjeta Ministarstvu sigurnosti BiH, 21.1.2021., izvještaj**

Asim Sarajlić, predsjedavajući, Borjana Krišto i Dušanka Majkić, zamjenice predsjedavajućeg, Marina Pendeš, Bariša Čolak, Šemsudin Mehmedović, Sredoje Nović, Sanja Vulić i Zukan Helez, članovi Zajedničke komisije za odbranu i sigurnost BiH dana 21.1.2021. godine su radno posjetili Ministarstvo sigurnosti BiH.

Radna posjeta je organizovana s ciljem upoznavanja sa aktuelnim stanjem sigurnosti i problemima koje sa sobom nosi migrantska kriza.

**Ministar Selmo Cikotić** je bio domaćin ovog sastanka kome su prisustvovali i Nedeljko Jović, zamjenik ministra, Zoran Galić, direktor Granične policije BiH, Slobodan Ujić, direktor Službe za poslove sa strancima kao i službenici u Kabinetu ministra Cikotića.

Tokom sastanka je razgovarano i o nizu značajnih pitanja koja karakterišu rad Ministarstva sigurnosti BiH, Granične policije BiH i Službe za poslove sa strancima.

U uvodnom dijelu sastanka **Asim Sarajlić, predsjedavajući**, je naglasio ciljeve radne posjete Ministarstvu sigurnosti BiH. To se, prije svega, odnosi na informacije o aktuelnom stanju u Ministarstvu sigurnosti BiH, aktuelne sigurnosne izazove, stanje i probleme koje sa sobom nosi migrantska kriza, kao i aktivnosti koje Ministarstvo sigurnosti BiH i policijske agencije u njegovom sastavu poduzimaju da se adekvatno odgovori na aktuelne izazove. Isto tako, naglasio je da članovi Zajedničke komisije žele da se upoznaju sa aktuelnim problemima u radu, stepenom koordinacije u radu policijskih agencija unutar Ministarstva sigurnosti BiH, mogućim rješenjima, te planovima za 2021. godinu

**Ministar Cikotić** je u svom uvodnom obraćanju posebno govorio o stanju sigurnosti u BiH, aktuelnim sigurnosnim izazovima, stanju sa migrantima, o unutrašnjoj organizaciji Ministarstva, te planovima za 2021.godinu. Informisao članove Zajedničke komisije o unutrašnjoj sistematizaciji, stanju sa nezakonitim migracijama, toku implementacije Nacionalne kontakt tačke sa EUROPOL-om, koordinaciji prihvata međunarodne pomoći – COVID -19, mjerama prevencije i borbi protiv terorizma i ekstremizma, pitanjima vezanim

za povratnike BiH državljanja sa stranih ratišta, statusu Zakona o sprečavanju pranja novca i finansiranja terorističkih aktivnosti, te o graničnoj i opštoj sigurnosti-integrisano upravljanje granicom. (uvodno izlaganje ministra Cikotića je u prilogu).

Nakon ministra Cikotića, aktuelno stanje sa migracijama je prezentirao **Senahid Godinjak, šef kabineta ministra**. Prezentirao je migrantsku rutu EU, migrantsku rutu kroz BiH, prikaz podataka IOM-a o broju registrovanih migranata na Balkanu za 2018. i 2019. godinu, smještajne kapacitete za migrante, status privremenih prihvatnih centara (Bira i kamp Lipa), zakonske pretpostavke za upravljanje migracijama, rad i aktivnosti Granične policije BiH i Službe za poslove sa strancima, trenutne izazove, finansiranje, izvještavanje, tok readmisije, pregled najznačajnijih rezultata Ministarstva sigurnosti BiH u upravljanju migracijama, preporuke za upravljanje migracijama te projekciju privremenih prihvatnih centara u BiH.(prezentacija S. Godinjaka u prilogu),

**Zoran Galić**, direktor Granične policije BiH, je upoznao članove Zajedničke komisije sa aktivnostima Granične policije BiH u rješavanju pitanja koja se odnose na stanje sa migracijama. Konstatovao je da je prisutan niz problema koje treba rješavati. Govorio je o nedorečenosti institucionalnog i zakonodavnog okvira, o aktuelnom stanju i planovima rada Granične policije BiH u oblasti obezbjeđenja sigurnih granica. Posebno se osvrnuo na probleme ilegalnih migracija, prekograničnog kriminaliteta, međuagencijsku i međunarodnu saradnju te saradnju sa susjednim zemljama.

Osvrnuo se na brojne probleme koje donosi migrantska kriza jer se Bosna i Hercegovina kao zemlja tranzita za migrante suočava s brojnim problemima i sigurnosnim izazovima. Nedovoljna kadrovska popunjenost, nedostatak opreme koja se koristi na graničnim prijelazima, nedostatak kapaciteta u cjelini govore da ne postoje optimalni uslovi za rad i obavljanje poslova i zadataka graničnih provjera. Nepostojanje odgovarajućih saobraćajnica i saobraćajne signalizacije, kontrolnih kabina i opreme u cjelini gorući je problem za GPBiH. Veliki sigurnosni izazov je u činjenici da migrantima koji ulaze u BiH nije moguće utvrditi identitet, što predstavlja potencijalnu prijetnju po sigurnost u BiH. Odbacio je optužbe o tome da on kao direktor radi za interese susjednih zemalja, posebno Hrvatske jer po njegovim riječima to su laži i nemoguća misija u kojoj niko iz sastava GPBiH ne učestvuje.

Brojni su problemi s nedostatkom graničnih policajaca, u ignoriranju prijedloga novih pravilnika koji bi rad GPBiH olakšali i učinili ga efikasnijim.

Planovi Granične policije BiH u oblasti sigurnosti granice, realizacija Strategije Granične policije BiH i drugih saglasnih strategija, u funkciji realizacije obaveza BiH u procesu pridruživanja EU, provođenje aktivnosti na usvajanju i primjeni zakonodavstva relevantnog za rad Granične policije BiH, sa aspekta potpunog usaglašavanja sa standardima EU, težišta su u radu u narednom periodu, što je posebno istakao tokom svog izlaganja.

**Slobodan Ujić**, direktor Službe za poslove sa strancima. Istakao je najbitnije aktivnosti u oblasti migracija, aktivnosti na sprečavanju i otklanjanju nelegalnih migracija. Brojni su problemi koji otežavaju rad Službe jer je riječ o mješovitim migracionim tokovima gdje je u najvećoj mjeri zastupljena kategorija ekonomskih migranata koji dolaze iz zemalja koje nisu zahvaćene ratnim dešavanjima. U pitanju su mladi ljudi i maloljetnici bez pratlje koji zloupotrebljavaju institut međunarodne zaštite, jer ne podnose zahtjev za azil. Veliki problem za Službu je podatak da je u 99% slučajeva riječ o migrantima bez ikakvih identifikacionih

dokumenata i dokaza o njihovom boravku na teritoriji druge države ili njihovom porijeklu, što stvara dodatne probleme u utvrđivanju njihovog identiteta i mogućnosti postupka readmisije. To je veliki sigurnosni izazov za BiH kao i prikupljanje saznanja o rutama kretanja migranata, potencijalnim mrežama krijumčara kao indicija koje pojedince mogu dovesti u vezu s međunarodnim terorizmom.

Nakon prezentacija, članovi Zajedničke komisije Dušanka Majkić, Marina Pendeš i Zukan Helez su postavljali pitanja i davali komentare na uvodna izlaganja.

**Dušanka Majkić** je komentirala uvodna izlaganja i prezentaciju te je postavila nekoliko pitanja za ministra Cikotića i njegove saradnike:

1. Da li Obavještajno-sigurnosna agencija BiH provodi mjere i radnje iz svoje nadležnosti kada je u pitanju dokumentovanje događaja u kampovima “Bira” i “Lipa”?
2. Koja su saznanja Ministarstva sigurnosti BiH oko sukoba koji se desio u prihvatnom centru u Blažuju dana 20.1.2021. godine?
3. Da li se koriste biometrijski podaci s ciljem identifikacije ilegalnih migranata?
4. Ko i na koji način dokazuje činjenice o statusu ilegalnih migranata (da li su to ekonomski migranti ili izbjeglice)?
5. Kako se obavlja readmisija ilegalnih migranta i kojom dinamikom? U kojoj mjeri je zaživio sporazum o readmisiji sa IR Pakistan?
6. Zašto EU šalje migrante u BiH i zašto šalje ljude bez identiteta?
7. Da li ima strategija za vraćanje migranata u matične zemlje i da li ih želimo vratiti kroz procedure koje su zakonima predviđene?
8. Kako se finansira migrantska kriza, kako se troši novac kojim raspolaže IOM  
Koji je status 80 policajaca iz MUP-a RS koji imaju status ispomoći i da li IOM i dalje finansira te aktivnosti?
9. Na koji način ilegalni migrant dolaze do novca i da li neko u BiH ima evidenciju doznaka novca za ilegalne migrante?

Naglasila je da je sastanak u Ministarstvu sigurnosti BiH samo inicijalni i da stanje sa ilegalnim migrantima treba transparentno prezentirati do kraja jer ne može IOM biti taj koji će diktirati aktivnosti BH institucija, a novac EU trošiti tako da se ne zna gdje i kako ide i zašto je namijenjen.

**Marina Pendeš** je konstatovala da su članovi Zajedničke komisije dobili kvalitetne i vrlo dobre informacije kroz prezentacije zvaničnika Ministarstva sigurnosti BiH. Mišljenja je da je krajnje vrijeme da Vijeće ministara BiH u punoj saradnji i koordinaciji sa Ministarstvom sigurnosti BiH upravlja migracijama. To jasno treba reći predstavnicima EU u BiH i visokim zvaničnicima EU. Smatra da je krajnje vrijeme da se kvalitetno zapriječi granica BiH na istočnom dijelu. To treba riješiti u komunikaciji Predsjedništva BiH sa Vijećem ministara BiH. To ne znači da OSBiH treba da čuvaju granice jer proces zaprečavanja i čuvanja granice su dva različita procesa. Hitno treba zaustaviti ulazak ilegalnih migrant u BiH i time će aktivnosti institucija, kako kantonalnih, tako entitetskih i onih na nivou države dobiti sasvim drugu dimenziju, naglasila je Pendeš.

**Zukan Helez** je pozdravio napore institucija da riješe problem sa ilegalnim migrantima.

Mišljenja je da Vijeće ministara BiH treba voditi procese i usmjeravati aktivnosti. Kantonalna rukovodstva ne mogu donositi odluke koje se tiču države BiH.

Nakon prezentacija i rasprave koja je obavljena te odgovora koje su dali predstavnici Ministarstva sigurnosti i policijskih agencija, zaključeno je da se svi traženi odgovori na pitanja članova Zajedničke komisije dostave u pisanoj formi u roku od sedam dana.

S poštovanjem,

**Predsjedavajući Zajedničke komisije**  
**Asim Sarajlić**

Dostavljeno:

- naslovu
- a/a